

Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq  
Medlem af Naalakkersuisut for Kultur, Uddannelse, Forskning og Kirke

Inatsisartunut ilaasortaq  
Hans Enoksen



Siumut

**Palasissaaleqineq ajoqissaaleqineq kiisalu pattattussaaleqineq qaangerni- 14. oktober 2009  
arlugu iliuseqarniarnissaq pillugu § 36 naapertorlugu apeqqummut Sags nr. 2009-021015  
nr. 2009-95-imut akissut Dok.nr. 243433**

Inatsisartut suleriaasianni § 36, imm. 1 naapertorlugu 5. oktober 2009-mi Naalak-  
kersuisunut ima apeqquteqarputit:

Postboks 1029  
3900 Nuuk  
Tlf: +299 345000  
Fax: +299 322073  
Email: kiiip@gh.gl

**Palasissaaleqineq ajoqissaaleqineq kiisalu pattattussaaleqineq qaangerniar-  
lugu matumuuna naalakkersuisut qanoq iliuseqarniarnerpat?**

**Akissut:** Aallarniutigalugu ilagiinni ineriartornermut aserfallatsaaliinermullu atatillu-  
gu soqutiginninninnut qujavunga. Ilagiinni sulinerup innuttaasullu ilagiinni sullinne-  
qarnerisa sapinngisamik aporfiusinnaasut qaangerniarlugit pinissaannut soqutigin-  
ninnerit Naalakkersuisunit isumaqatigineqarpoq.

Palasissaaleqinermut tunngatillugu Naalakkersuisut sunik siunertaqarnersut  
aperivutit. Tamatumunnga ilisimatitsissutigisinnaavara maanna Ilisimatusarfimmi  
Institut for Teologiimi ilinniartut aqqaneq marluummata. Tamatuma saniatigut Kø-  
benhavnimi Det teologiske Fakultetimi kalaaleq ataaseq ilinniartuuvoq.  
Tamanna Ilisimatusarfimmi institutini pineqartuni ilinniartoqarneq tamarmiusoq  
eqqarsaatigaaanni naamaginarfik ilinniartoqarnertut isigineqartariaqarpoq.

Erseqqissaatigineqassaarli Ilisimatusarfimmi upperisarsiornermik ilinniartitaaneq  
atorfininnissaq siunertaralugu ilinniarfiunngimmat, tassa palasissatut ilinniarfivittut  
ilinniarfiunngimmat fagimili upperisarsiornermi bacheloritut ilinniarfiulluni palasin-  
ngorniarfimmu qinnuteqarnissamut periarfissalik. Taaneqareersutut kingulleq  
bachelorinngornermut ilassutaavoq aatsaallu palasinngorniarluni seminariami  
naammassinninnerup kingorna nunatsinni ilagiinni palasitut sulinissamut palasin-  
ngorniaq piginnaatitaallissaaq.

Upperisarsiornermik ilinniartut aamma tamatuma kingorna palasit atorfegalernissaat Naalackersuisut qularnaarsinnaangilaat tamannalu pissutigalugu Naalackersuisunit palaseqarfiit tamarmik qaqugu namminneq palaseqalernissaannut piffisaliisoqarsinnaangilaq. Atorfiilli inuttaqanngitsut inuttalerneqarnissaannut sunik periarfissaqarnersoq Naalackersuisut misissuleruttorpaat.

Naak palasit arlallit utoqqalinersiaqalingajaleraluarlutik ilarpassuisa atorfimmini ingerlaannarnissartik kissaatigaat, tamannalu Naalackersuisunit qutsatigineqaaq. Tamatuma kinguneraa maanna palaseqarfiit marluk namminneq palaseqannginnerat. Tamanna maanna naammaginartut isigineqartariaqarpoq, inuiaqatigiit eqqarsaatigalugit naliliinikkut, kiisalu upperisarsiornermi bacheloritut naammassisut amerlanersaat palasinngorniartangimmata.

Naalackersuisut ilisimatitsissutigisinnaavaat Kultureqarnermut, Ilinniartitaanermut, Iisimatusarnermut Ilageeqarnermullu Naalackersuisoqarfik 2008-mi ukiakkut suleqatigiissitanik pilersitsimmat. Suleqatigiissitat suliassarimavaat palasissaaleqinerup aaqqiivigineqarnissaanut atatillugu suliniutaasinnaasunik qulaajaanissaq.

Suleqatigiissitat suliniutaasinnaasut ilaatigut eqqartorpaat immikkut ilinniartitaanermik aaqqiissuteqarnissaq 1990-ikkunni pilersinneqartumut naapertuuttumik. Ilinniartitaaneq "palasi palasinngorniatut upperisarsiornermik soraarummeersimasoq" suliatiqut isigalugu upperisarsiornermik ilinniartitaanermi soraarummeersimanerup sisamararterutaanut naapertuuttoq. Suleqatigiissitanut ilaasortat isumaqatigiissutigaa immikkut ilinniartitaanermik pilersitsinissaq kissaatigineqanngitsoq. Tamatumunnga taarsiullugu palasinut atugassarititaasut pitsanngorsaavigineqarnissaat, kiisalu palasit atorfegarnerup erseqqissaavigineqarnissaa taamaalillunilu amerlanerusut palasinngorniarnissamat pilersinniarneqarnissaat misissorneqarpoq.

Illumoorpoq illoqarfiit nunaqarfiillu tamarluinnarmik namminneq palaseqartinneqarnissaannut sulisussaartoqanngimmat. Taamaattumik ajoqit palaseqarfimmi palasip suliaanut ikiortasinnaangorlugit ilinniartinneqarnissaat Naalackersuisut soqutigaa. Konto pingaarnermi 40.92.14, Ajoqissanik organistinillu ilinniartitsineq, qularnaarneqarpoq ajoqissanik organistinillu ilinniartitsinissamat ukiut tamaasa aningaasassaarnissaa. Qinnuteqartunik pineqartunik akuerinnittarneq pisarpoq qinnuteqartup illoqarfimmi nunaqarfimmiluunniit angerlarsimaffigisaani ajoqimik/organistimik pisariaqartitsisoqavikkaangat.

Ajoqinngorniarneq ingerlaavartumik pisarpoq ukiunilu marlunni ingerlasarluni. Maanna ajoqinngorniat quliupput holdillu tullii 2011-mi ilinniakkamik aallartippata amerlanerusut akuerineqarnissaat naatsorsuutigineqarpoq. Provstit palasillu illoqarfinni nunaqarfinniluunniit palaseqanngitsuni ajoqeqanngitsuniluunniit ilagiinni qinnuteqarsinnaasut ajoqinngorniarnermik ilinnialernissamat qinnuteqaqqullugit kaammattuineramik sulialerujussuupput.

Organistissaaleqineq qaangerniarlugu organistinik ilinniartitsinerup saniatigut nutsugiarsortartunut pikkorissartitsisoqartarpoq. Nutsugiarsortartut taamaalillutik ilagiinnut oqaluffimmi nipilersornissamat pisariaqartinneqartumik pisinnaasaqaler-

tarput. Sammisaaq tamanna aamma ajoqinngorniarfimmi ilanngunneqartarpoq ajoqissat nipilersornikkut pisinnaasaqalersinniarlugit.

Oqaluffinnik palasinullu inissianik aserfallatsaaliinermut tunngatillugu Naalakkersuisut ilisimatitsissutigisinnaavaat oqaluffiit illutaannik iluarsaanermik aserfallatsaaliinermillu sulineq annerusoq aallartinneqareermat. Aammattaaq oqaluffiit palasinullu inissiat qanoq issusii pillugit nalunaarusiornissaq pillugu Naalakkersuisoqarfiup Nuummi INI A/S-imi teknikimut immikkoortorta quleqatigilereerpa.

Taamatuttaaq palasit angalasarnerannut tapiissutit pillugit apeqquteqarputit. Angalanissamik pisariaqartitsisoqarnera Naalakkersuisut ilisimavaat. Tamanna ilaatigut kontup pingaernerup 40.92.14-ip, ajoqissanik ilinniartitsineq, pilersinneqarneranut pissutaasut ilagaat, tassami illoqarfinni nunaqarfinnilu palaseqanngitsuni ilagiinni sullissinerup ilaanik annertuumik isumaginnissinnaammata. Palasit angalasarnerisa siuarsarneqarnissaat provstit kissaatigigunikkut tamanna salliutissinnaavaat, tassami ukiumoortumik aningaasaliissutisiaminnik namminneq aqutsisaramik.

Namminersulernerup kingorna ilagiinnut tunngasut taakkulu siunissami ineriartornissaat pillugu nassuiaasioqarnera Naalakkersuisunit suliarineqaleruttarpoq. Tassani ilagiinnik siuarsaavioqataasussamik ilagiinnilu aqutsinermik suliaasaqartunut Kalaallit Nunaanni ilagiinnik isumaginnissamut suliatigut ilisimannittuusunut tunngaviliisussamik ineriartortitsinermik suliniuteqartoqarpoq. Naggasiutigalugu oqaatigineqarsinnaavoq Naalakkersuisut ilagiillu isumaqarmata nunatsinni ilagiinnik sullissineq maanna inuiaqatigiinni pissutsit aallaavigalugit isigigaanni isornartorsiugassatut isigineqarsinnaanngitsoq.

Inussiarnersumik inuulluaqqusilluta

Mimi Karlsen